

Alle Jahre wieder: Wéi Dir jo antëschend villeicht wësst, ☺ fueren mir bei de Scouten nëtt nom Kalennerjoer, mais nom Scoutsjoer, dat sech um Schouljoer orientéiert. Mein Aperçu z'Joert op der Generalversammlung hat mat der Sommervakanz 2017 opgehal. Duerfir wëll ech Iech elo hei, an der nämlecher Logik, en Iwerbléck ginn, iwert d'Aktivitéiten vun eisem Grupp am Scoutsjoer 2017/2018.

D'Scouts-Joer 2017/2018 **bei de Guiden a Scouten St. Martin Duelem**

- Daat neit Scoutsjoer gong , wéi gewinnt un mam **LGS-Kongress**, **deen dëst Joer zu Dikrech** ausgeriicht gi war. Mëttwochs de 27te September 2017 huet sech eng Delegatioun vu 7 vun eise Cheffe en marche gesaat hun, fir d'Generalversammlung vun eisem Verband den LGS matzemaachen. Dest ass, eigentlech éischter eng méih dreschen a lang-otmeg Affaire, mat Réck an Ausbléck vun alle Branchen an dem Unhuelen vu Bilan a Budget, mais dëst Joer war et méih spannend well en neit Team fir de Posten vu COGe an COGe adj. gewielt sollt ginn, an d'Présentatioun vun 2 Equippen eng richteg Wahl méiglech gemacht huet. Um Enn vun enger spannender Wahl hat eis al Bekannten d'Annouck Galassi mat sengem Adjoint Yves Marci d'Ofstëmmung gewonnen a war fir dëse spannende Posten gewielt.
- Direkt den nächste Samsdeg den 30te September 2017 ass eise Grupp nees öffentlech wakrech gin. De **Schnupperdag 2017** stoung um Ordre du jour, a mir wollten eis jo mat neie Memberen vun ënnen erop erneieren. Bei grausamem Wieder dobaussen, war de Schnupperdag fir eis dach eng immens Réussite, well sech ganz vill nei Kanner an den ënneschte Branchen gewisen haten, sou dass d'Biber an d'Wëllef elo zu souvill waren wéi nach nie.
- Sondes den 1ten Oktober huet de Steve dun eng Delegatioun vun Duelemer Cheffen op **den LGS-Chefdag** op Dikrech begleet, fir hei déi nei Proposen an Iddien vum Verband kennezeléieren. Leider war sech d'Majoritéit vun eise Frënn och dëst Joer nees eens, datt ënnert der Form de Chefdag kengem méih vill gett an et eigentlech jhust de Leit Zeit gestuel ass.
- Fir de Gemenge-Wahlsondeg den 8ten Oktober 2017 hate mir eisen **1. Grupperot** vun der neier Saison nom bewährte Schema vun de läschte Joeren opgeluecht. Och wann den Tedeum op deem Daag zu Duelem ausgefall war, hu mir eis no der Mass beim Home afonnt fir zesummen ze schaffen. Mir hun d'Konstruktiounsholz daat nom Go-Urban an der Wiss gelandt war an eisen neien Holzschapp geluecht an domat d'Wiss geraumt. No engem kurze Picnic hu mir déi grouss Linnen vum Programm vir déi nei Saison besprach a festgeluecht, éih am Nometteg eis Frënn vun Amicale an Albatrosse bei eis koumen , a mir mat enger leckerer, vum Steve organisierter Agape am Go-Urban-Chalet dësen Daag gemittlech ausklénge gelooss hun.
- Samsdes den 21ten Oktober sinn de Carlo an de Mike op Buerglënster gefuer, fir do e ganzen Unhänger **fäerdeg geschniddent Brennholz** sichen ze fueren daat d'Stephie eis geschenkt hat.

- De selwechte Mëtteg huet sech **d'Montéskarussel 2017** ugefange ze dréien, an eng Partie **Biber** hu mussen all hire Mut zesummenhuelen, fir hire **Wee an d'Wëllef** ze fannen. An engem Tauschspill hu sie missten am Duerf bei Leit schälle goen a sech hirt Material zesummentauschen fir déi gestallten Aufgaben ze léisen.
- Eigentlech wollte mir **Mäertensdag** nëmmen all 2 Joer grouss feieren, an no 2016 wier dann dëst Joer eigentlech Paus gewiecht. Well awer den Här Erzbischof iwert eise Frënd de Romain ze erkennen gin hat dass hien eis eng Kéier wéilt besiche kommen, hate mir beschloss, awer 2017 eise Patréiner, op sengem Daag Samsdes den 11ten November 2017 grouss ze feieren, an den Här Erzbischof duerzou ze invitéieren. Esou koum et dass mir fir dëss Gelegenheet nees all Regester wollten zéien, vu Mass iwer Szenespill, Sammlung fir arem Kanner, Lanteren-Ëmzuch mat Musek a Päerd an engem gudden Maufel war alles viirgesinn. Well d'Duelemer Musek nett komme konnt, hat den Chad et iwerhollet free-lance Museker zesummenzetrommelen fir esou eng ad-hoc Musek op d'Been ze stellen déi eise Kortège musikalesch géif begleeten. Den Här Erzbischof, deen mir ugangs mat engem Foullard an d'Familie gekleed haten, huet eis eng ganz flott Mass gehalen, déi vun eise Scouten gestaltet a gesanglech begleet gouf, an um Enn vun der Feier huet och nach eis Frëndin d'Sophie, um Altoer sei grousst Scoutsversproochen ofgeluecht an sech esou offiziell an öffentlech zu eis bekannt. Nom Kortège mam Mäerten a mam Heeschemann zu Päerd, si mir mat ganz ville Leit hongreg an den Home agefall, wou de Steve an eng Reih fleisseg Helferlein, e ganz besonnesche Mäertensmenu a Form vu gebrode Gromperen mat Omlette a rauwen Mengen viirbereed hat, an op deen eise Grupp all Mënsch gratis invitéiert hat, sou dass keen huet missten Hunger oder Duuscht leiden. Den nächste Muergen konnt de Carlo e ganzen Unhänger voll Spillsaachen, Velo'en a Gezei an d'Stadt féiern wou déi Responsabel vun der Fmpo se mat Freed fir hir Schützlinge an Empfang gehollt hun.
- Iwregens waren dee Samsdes virun der Mäertensfeier och nach eis Avex a Wëllef um Tour, fir eng Reih konfirméiert Wëllcher duerch **d'Montée an d'Avex** ze bréngen.
- Jhust eng Arbechtswoch méih spët, de 17ten November war Duelem schon nees scoutstechnesch à la une. **D'Gruppechefféquipe vum Verband** hat gefroot **d'Hierscht-Cheffrencontre 2017** kennen zu Duelem ze halen. Esou hate mir fir déi entsprechend Infrastrukturen gesuergt, de Centre reservéiert, de Wee markéiert an e grouss Kéisbuffet opgeriicht deen et no dem sérieux'en Deel mat engem Patt Beaujolais nouveau sollt gin. An 3 Atelier'en ass gudd geschafft gin an duerno war et Metternuecht, éih mir de Centre geraumt an zougespaart haten.
- An dun goug et nees séier, d'Adventszeit stung virun der Diir, an **Adventzkränz** sollte gemacht gin.. Fir den 2ten Dezember waren 92 Kränz bestallt, a bis owends och ausgeliewert gin, sou dass, nieft dem edukativen Apprentissage fir d'Kanner och nach en erfreenlechen Gewinn fir eis Kees ze vermelden war.
- Den nächsten Daag, Samsdes den 3ten Dezember haten mir nees eng Equipe vun 7 Leit zesummekritt, fir bei der **porte ouverte vum Buttek Mosaik** zu Fëlschdreff mat enger gemeinsamer BA a Form vu Gromperekichelcher, d'Waardzeit op d'Gebuert vun eiser Här Jesus Christus an der richteger Gesënnung, an an der richteger Stëmmung unzefänken an esou e klengen Deel vun Eppes Groussem a Guddem ze sinn.
- Den 8ten Dezember 2017 waren eis Carapio op en **Keelentournoi** fir hir Branche, deen vun der Regionaléquipe organiséiert gi war. Emmerhin sinn eis Frënn bei deem Tournoi déi 2. ginn!
- Ongewéinlech spët am Joer, op de 14ten Dezember 2017 hat d'Coque eis geruff fir beim Catering bei der **Notp 2017** ze hëllefen, an domat eiser Kees nach e klengen

Upgrade viru Kreschtdag ze verpassen. Mat 35 Leit hu mir hei nees eng zefriddestellend Performance gebueden.

- Dënschdes den 19ten Dezember hun eis **Albatrossen** mol nees vu sech héieren gelooss. Mat 10 Erwuessenen an 2 Kanner hu sie sech op **Saarbrécken op de Krëschtmaart** gemaacht, fir emol esou ee Maart ënnert dem Saarlännesche Motto „Hauptsach gut gess un getrunken“ ze erliewen.
- Fir Freides den 22ten Dezember hat d'EAR op Gréivemaacher invitéiert, fir **d'Friddenslicht vu Betlehem 2017** sichen ze kommen, daat déi Gréivemaacher Scouten de WE viirdrun fir Letzebuerg op Wien siche waren. De Stan an d'Deborah si mat enger klenger Duelemer Delegatioun dobei gewiecht. Well sie keng Gamell dobei haten kruten sie keng Zopp, an d'Friddenslicht ass och nëmmen ganz beiläufig ofzehuelen gewiecht. Schued, dass dest starkt Symbol ëmmer méih niewesächlech gett bei de Rassemblementer, déi den Numm „Verdeelungsfeier“ an den 2 läschte Joeren eigentlech nett méih verdingt haten.
- Mais mir haten et jo dunn zu Duelem, an et blouf och keng Zeit sech nach vill weider Gedanken ze machen, well schon den nächsten Dag, Samsdes den 23ten Dezember war nees grouss Action ugesoot. Fir eis **Kreschtfeier** am Grupp ware mir an 3 Equippen vun Erséng, vu Felschdreff a vun der neier Duelemer Schoul lass gangen, fir ëm 17:00 zesummen zu Duelem an der Kiirch bei der Krëppchen ze sinn an do eng intensiv Krëscht dags-Veillée ze erliewen an zesummen an der Krëscht dagsfreed ze sangen. Duerno si mir an den Home gang wou mir eis zu 57 Leit grouss a Kleng géigenseiteg e Cadeau gemaacht, an eis e schéine Kreschdag gewënscht hun, éih mir un den Dësch gange sinn, fir eis eng herrlech Lasagna schmaachen ze loosse, déi de Steve an d'Monique mat vill Léift a Kennerschaft viirbereed haten.
- Elo musst et, den nächsten Daag jhust nach **helleg Owend** gin, a schon ware mir nees mat ziemlech ville Scouten fréih mettes am Home, fir an 3 Equippen mam **Friddenslicht vu Betlehem**, eise gudden Wënsch an enger Tiitchen mat, vun de Kanner selwer gebake Kichelcher op den Tour ze goen bei al, krank oder soss Leit, déi eng Antenn fir d'Friddenslicht hun, ze fueren. Nett all Besuch ass vu viir eran einfach, mir haten dëst Joer eng Reih Leit op eiser Lëscht, déi eis nostinn, an déi schlëmm krank waren. Mais och dëst Joer war d'Freed bei de meeschten Leit e wonnerbare Merci un eis, an eng kloer Bestärkung, dass d'Mënschen besonnesch an dësen Deeg op en Zeechen vu Liicht an Hoffnung warden.
- Knapps zeréck zu Duelem, hu mir schon eist Material geschnappt, fir et um Parvis vun der Kiirch opzeriichten. Et ass och daat antëschend eng léif Traditioun ginn, um Enn vun der Familljemass op helleg Owend, de Leit eng Käerz mam Friddenslicht ze schenken, a sie bei engem Glühwein oder Schoky an e Puer Kichelcher ze invitéieren, nach e puer Momenter an der echter Krëscht dagsfreed zesummenze bleiwen. Nodeems eis't Material nees am Home louch, konnte mir Cheffen, liicht midd awer ganz frouh am Häerz och bei eis Famille fueren fir Krëscht daag ze feieren.
- Et sollt nett laang daueren, bis mir gewuer musste ginn, wéi no heiandsdo Freed a Leed bei eneen leien. Knapps hate mir daat neit Joer 2018 ugefangen, wéi eis den 2te Januar moies eng ganz traureg Nooricht erezicht huet. Eisen treie Frenn de **Raymond Watgen**, aktiven Amicalesgrënnungsmitglied a laangjährege Keessier vun eisem Groupe, Mann vun eiser Frëndin dem Margot, Papp vun eise Grënnungsmitgliedern, aktive Cheffen a léiwe Frënn dem Annouk a Steve, waar deen moien u senger schwéierer Krankheet **verscheed**. Esou hu mir eis an enger ganz grousser Delegatioun mat Fändel an an Uniform Samsdes de 6te Januar 2018 mëttes zu Duelem um Kirfecht afonnt, fir de Raym op sengem

läschte Wee wüerdeg ze begleeden, an eise Frënn dem Margot, dem Annouck an dem Steve duerch eis Präsenz eis Léift an eis Verbonnenheet ze weisen. Flott war, dass eng Reih Cheffen spontan mat op den Ducksall gange sinn, fir dem Raym seng Begriefnessmass mat ze sangen.

- Den 20te Januar hat eis den Alldag mat senge Plattituden nees am Grëff. Am Viirfeld vun eiser GV sollt den **Home gebotzt a geraumt** gin. Daat war eng Titanenarbecht déi ganzer 10 Leit vun eis an Otem gehal huet. Eleng de Vidange un eidele Fläschen, déi mir evaquéiert hun huet eisen Unhänger bal ganz gefällt an eis eng déck note de crédit vum Dépositaire abruecht..
- Dënschdes den 23te Januar 2018 war et dunn nees Zeit fir öffentlech d'Kaarten op den Dësch ze léen waat den Zoustand vun eisem Verein ugeet. An der **Generalversammlung 2018** woussten souwuel de Sekretär wéi och de Caissier vill Erfreeleches ze rapportéieren an hun doduerch bewisen, dass eise Grupp finanziell gesond an ganz aktiv ass.
- Fir de WE vum 12. op den 13te Februar 2018 haten sech eis **Biber** op Schëtter an de Chalet vun der FNEL aquartéiert fir hei zesummen e flotten **FuesWE** ze erliewen. Well endlech emol Schnéi louch, konnten sie sech dobaussen an der Natur richteg austoben. Ofgerënndt gouf dëse WE mat enger grousser Fuesparty fir déi jidfereen sech eng extra Verkleedung matbruecht hat.
- Fir Samsdes de 24te Februar 2018 hat d'Wëllefcherséquipe d'Meuten aus dem ganze Land op e Rallye an d'Stadt invitéiert fir de weltweiten **Thinking-day** ze feiern. Dësen Dag leit eigentlech op dem BP sengem Gebuertsdag um 22te Februar (dest Joer den 161ten) an war initial geduecht fir de Guiden déi weltweit Dimensioun vun hirem Mouvement ze rappéléieren. Esou stoung dest Joer de Rallye ënnert dem Thema „Impact“ also den Afloss vun Guidissem/ Scoutissem an der Welt. Eis Wëllefcher wärten nieft dem flotten Gemeinschaftserliefness haaptsächlech am Verhalt behalen, dass et deen Daag saukal war.
- Dënschdes de 6te Mäerz 2018 hate mir all eis Memberen invitéiert, fir an enger Feierstonn de **25te Gebuertsdag vun eisem Scoutsgrupp** ze commémoréieren. Tatsächlech war et deen Daag genau 25 Joer hier, dass mir eng éischte Kéier d'Kanner aus eisen Dierfer zesummengeruff haten, fir mat enger 1. Schnupperversammlung zum Thema „Indianer“ eise Grupp ze demarréieren. Fir dëse ronne Gebuertsdag hate mir bewusst op eng grouss Feier no baussen verzicht. Villméih wollte mir am Grupp zesummen Réckbléck halen op eis gemeinsam 25 Joer. Wien eis kennt weess, datt daat nett ouni e gudder Maufel an muenech guddem Patt konnt goen. Bei der Gelegenheit ass och en detailléierten Inventaire vun de ville Mitbringsel déi eisen Home zieren, viirgestallt ginn. Mat der Propose fir 2019 e neien Ulaaf ze huelen fir e gemeinsamen Team-Buildingscamp an der Chefféquipe ze maachen, ass dësen denkwürdegen Owend ausgeklungen.
- Fir Donnegdes den 22te Mäerz 2018 hate mir eng ongewinnten Invitatioun viirleien. De **Foyer St. Joseph um Senningerbiere** war läschten Hierscht de Bénéficiaire vun eiser Sammelaktioun op Mäertensdag. Als Merci haten sie eis invitéiert fir eng Visite vun hirem Haus. Esou ass deen Owend eng gréisser Delegatioun vu Cheffen a Carapio aus eisem Grupp dohin gefuer a ware gespannt op daat waat sie géif erwaarden. Et gouf e flotten Owend, bei deem besonnesch déi Jugendlech Bewunner vun dem Foyer mat vill Freed hir Institutioun viirgestallt hun, an esou e perséinleche Merci gin hun, fir deen Interessie, deen mir mat eiser Aktioun fir sie gewisen haten.
- De 25te März 2018 hun eis Carapio mat 3 Scouten an 2 Cheff beim **JOCAPI**, der Journée Cara Pio matgemaacht.

- Et ass an eisem Grupp eng kleng Traditioun ginn, dass mir an der Karwoch eise krëschtliche Profil méih betounen wéi soss, an daat mat allerhand Aktiounen als Virbereedung op Ouschteren. **D'Operatioun Getsemani 2018** huet vu grénge Donnegdeg dem 29te Mäerz bis zur Ouschternuetsfeier op Karsamsdeg dem 31te Mäerz 2018 eng kleng a variabel Zuel vu Jonken an enger ganz intensiver Präparatioun op Ouschteren zesummengeféiert. No Nuetswanderung op de Kaaschtel, vill Atelier'en, Kraitzwee mam Poobst via Satelit, Nuetsfilmsession, Beicht an der Stadt, Fastenlauf a Partizipatioun un der Operstehungsfeier wou mir d'Ouschterfeier ugefang hun, hu mir d'Sessioun 2018 Samsdes nuets mat enger Resurrection-party am Home ofgeschloss.
- Vum 13ten bis den 15ten Abrëll waren 3 vun eise Carapio, op der 11ter Editioun vum **Iron-scout** dobei. 2 Cheffen vun eis hun sech als Streckeposten nützlich gemacht, an 1 vun eise Scouten huet déi Streck vu 65 km Foussmarsch gepackt. Respekt, daat muss een mol fäerdegbréngen.!!
- Eng Woch drop stoung schon den nächste feste RV un, den Ufank vun der Muttergottesoktave, an domat fir eis de **Pélé des jeunes 2018**. Nom bewährte Schéma vun de läschte Joeren hu mir eis Samsdeg owends den 21ten Abrëll an den Home verzunn, fir mat enger gudder Raclette de Kierper ze stärke fir eise Pilgergang an d'Stadt. Mat enger intensiver Veillée hu mir eis och spirituel agestëmmt an du gong et ganz fréih an der Nuecht lass a Richtung Stadt. Flott war och dest Joer nees, dass mir et fäerdeg bruecht hun e Stéck ze pilgeren am gemeinsame Gebied. Mir waren schnell ënnerwee an doduerch vill ze fréih bei der Kathedral. Gottseidank hun se déi, fir d'Museker fréih opgemaakt, a mir konnten eis am Waarmen erblösen. Esou ware mir nees fit fir d'Pélésmass an den anschliessenden traditionelle Kaffi um Maertchen.
- Samsdes den 28ten Abrëll 2018 huet eis nees e méih freedege Moment an Uniform bei der Duelemer Kiirch zesummengeféiert. De **Chris Kaufmann** e Scout vu Klengem op an aktive Cheff bei de RaRo huet, deen Daag sei **Conny bestued**. Kloer dass mir do nett fehle konnten. Mat e puer traditionelle Spiller an en etlechen Drëppen hu mir sie an hir Gesellschaft virun der Kiirch amuseiert, a mir konnten nach jhust eise Cadeau an eis gudd Wësch lass gin ier et richtig ugefang huet mat schiffen.
- Well mir dest Joer irgendwéi nett méih fréih ukomm waren, hu mir 2018 eis **Agape** fir Memberen, Amicale a Frënn déi eis op der viireschter Kirmes gehollef haten eréischt fir Freides de 4te Mee 2018 owends zu staan bruecht. Duerfir hu mir dunn awer mat 44 Leit e flotten spueneschen Owend bei Paella, spueneschem Wein a muenesch guddem Maufel virun, an duerno erlieft, an en haarde Kär soutz nach bis spéit am Home zesummen ze sangen an ze feieren.
- Direkt den Daag duerno waren eis kleng Frënn awer schon nees um Dill, well an der Stadt, et war jo Oktave, war fir Samsdeg de 5te Mee eng **Biber a Wëllefchers-Andacht** an der Kathedral organiséiert gin. An do duerften déi Duelemer jo nett fehlen.
- A wou sie schon lancéiert waren, sinn eis Wëllef och deen nächsten Daag nees aktiv bliwwen. Fréih moies Sondes de 6te Mee hu sie de Wee op Suessem ugetratt, fir sech do um **nationale Wëllefchersrallye** mat aneren Meuten aus dem Land ze treffen a ze moossen.
- Déi Stärkung vun der Agape hate mir och gebraucht, well nëmmen 4 Deeg méih spéit war eis gréisst alljährlech Aktioun programméiert, eis **Scoutskirmes**. Duerfir sinn Dëschdes owends dem 9te Mee eng ganz Reih grouss Zelter op d'Scouswiss gestallt ginn. Nach deen Owend hun eng 20 Leit op der LGS-Bühn déi 7. Editioun vun eiser antëschend schon traditioneller **Albatrosse-Summerraclette** hautno materlieft. Den nächsten Daag ass fleisseg weider Material op d'Wiss bruecht an opgeriicht gin a

pénktlech fir Mëttwoch owend huet eis Kirmes mat dem Konzert vun enger ad-hoc Musek ugefang déi e puer vun eise Frënn extra fir dësen Owend zesammenbruecht haten.. Den nächsten Daag op Christihimmelfahrt hu mir als éischt zesammen d'Kirmesmass an der Duelemer Kiirch matgefeiert an matgestaltet. Dest Joer war dëss Mass, no Ausso vu ville Bedeelegeten, e ganz besonnesch schéint Gemeinschaftserliefness nett zuläscht och well mir an eis Kirmesgäscht no ville Joer eng gewësse Routine am gemeinsame Sengen kritt hun. Direkt no der Mass ass jidferen op sein Posten gestieert, fir d'Bekäschtegen vun eise Gäscht an den Amusement vun de Kanner op eiser Kirmes ze assurieren. Eis gewinnten Highlights wéi Volleyballturnier a Kouhscheisspill hun dervir gesuergt, dass kengem d'Zeit ze laang ginn ass, an owends um 22:00 hate mir schon déi 4 grouss Zelter nees drëschen ofgebaut an agepaakt. Freides den 11te Mee hu sech eng Reih vun eis nees zesummeformt, fir de Räscht vum Material ofzeriichten an anzepaaken. Flott ass hei all Joer nees, wa mir an der Mëttesstonn beim Home zesummekommen, fir wéi eng grouss Famill zesammen mat de Räschter vun der Kirmes Metteg ze maachen. Och eis Schoulkanner kommen an der kurzer Mettespaus bei eis, an et geet monter zou. Schlieslech hu mir den Home hannert eis zougespaart, an eis RV ginn fir Owends zu Welfréng a Schmatten eis bei engem gudden Maufel zesammenzufannen fir daat gudd Gefill ze genéissen, zesammen eppes Grousses, an daat Richtegt gemaacht ze hun.

- Vum 19ten op den 20te Mee waren eis Carapio mat 2 Cheffen a 5 Scouten op engem **KenneléierWE** mat de **Carapio** vun Eschduerf, mat deenen sie e gemeinsame Summercamp geplangt haten.
- Fir Sondes den 3te Juni 2018 war zanter lange Joeren emol nees eng **Härleichendaagsprozessioun** zu Duelem geplangt. Déi meescht vun eise Kanner a Jugendlech haten nach nie an hirem Liewen esou Eppes gesinn. Duerfir hu mir eis hei an Uniform massiv bedeelegt, déi Kleng hu Blummen gestreet, an eis Carapio hun matgeholl den Himmel iwert dem Sakrament ze droen, soudass, bei strahlendstem Wieder dëss Prozessioun och ouni Musek e beandrockend a wûrdegt Erliefness war.
- Fir d'zweet an 2 Méint hate mir d'Chance engem Frënd aus eiser Chefféquipe um Wee an den Hafen der Ehe de Réck ze staipen. Samsdeg den 16te Juni, war et de **Stanislas Vandivinit, deen mam Yasmine** zu Duelem an der Kiirch d'Sakrament vum **Bestiednes** empfang huet. Och hei hu mir virun der Kiirch mat engem zünftegen Empfang dervir gesuergt, dass sie nett mat zevill Klenggeld an den Täschen op den Apéritiv musste goen.
- Fir Freides den 22te Juni 2018 hat eis Gemeng op e Cortège, en Tedeum an Zivil Feierlechkeeten am Centre culturel invitéiert, fir do mat alle Vereiner a Bierger, déi **offizielle Feierlechkeeten zum Nationale Feierdag** an der Gemeng Duelem ze begoen. Selbstverständlech ware mir hei, mat eisem Fändel dobei, fir eis Faarwen an dat grousst gemeinschaftlecht Bild anzebréngen.
- Samsdes den 07te Juli 2018 haten eis Biber e RV mat der grousser BiberFamill vun den LGS. Den Daag war um Neihaisgen de **Biber mud 2018**, eng Art Kirmes mat Spill a Spaass fir all d'BiberFamillen aus dem Land. Daat sinn ëmmer flott Gelegenheeten souwuel fir d'Kanner wéi och fir d'Cheffen, ze erliewen wéi Grouss de Scoutsmouvement hei am Land ass, a wéivill aner Kanner a Jonker déi eegen Freed um Scoutsinn deelen.
- Den 10te Juli, kurz virun der Summervakanz huet sech eis ganz Chefféquipe eng läscht Kéier am Home fir e kurze **Grupperot** getraff. Läscht Décisiounen betreffend déi verschidde Camp'en déi gleich sollten ugoen, goufen nach gehollt, an du koum de gemittlechen Deel vun dësem flottste Grupperot vum Joer. Zur Feier vu sengem

Gebuertsdag huet eis eise Gruppecheff a Frënd, de Steve dëst Joer nees eng Agape zervéiert, déi den Owend op eng ganz agréabel Art a Weis ausklénge gelooss huet.

- Als éischt sinn dunn eis **Carapio** fir hire **Summercamp** opgebrach. Vum 13ten op den 23te Juli huet et sie, mat 2 Cheffen an 5 Carapio, op Kandersteg an d'Schweiz verschloen, wou sie zesummen mat dem Trupp vun Eschduerf, vill abenteuerlech Erlebnisser an de Schwaitzer Bierger konnten erliewen.
- Et war un der Summercampszeit an den Daag no de Carapio sinn Samsdegs de 14te Juli och eis **Wëllef** mam Zuch no Norden opgebrach. Bis de 17te Juli 2018 waren sie zu Klierf bei de Pateren op hirem **Summercamp** ënnert dem Thema „**Mister X**“. Et war en Detektiv-camp wou sie mat vill verschiddenen Aktivitéiten wéi, Nuetsspill, Cluedo, Schwemm, verschidden Atelier (Geheimschreftem, Gipsoofdrock vum Fouss, Feier maan, um Feier kachen), fit gemacht goufen fir den Highlight, den interaktiven Dinnerkrimi. wou sie hautno un der Léisung vun engem schwierege Fall bedeelegt waren. Vun deem Dinnerkrimi hu mir d'Kanner nach virun Krëschttag ganz begeeschtert verzielt, waat wuel déi bäschte Reklamm fir e gelongene Camp ass.
- Vum 28. bis den 30te Juli 2018 waren dunn och nach eis **Biber** op e **Summercamp** ausgeschwärmt. Mat esouville Kanner wéi nach nie, hu sie sech zu Monnerech an engem flotte Chalet ganz baussend dem Duerf agenistet, fir dem **Tarzan** ze hëllefen, e verréckte Professor ze stoppen, deen d'Natur wollt futti machen. A waat soll ech Iech soen, no 3 Deeg intensivem Camp, haten sie de Geck verdriwwen an d'Natur gerett. E grousst Fest mat Lagerfeierkachen huet dësen Triumph ofgerondt, a Méindes owends konnten d'Elteren hir Kanner, dreckeg a midd awer frouh nees matheemhuelen. Schued nëmmen, dass dëst eise Chad sein läschten Asatz als Bibertruppecheff sollt sinn. Besonnesch an der Gestaltung vun de BiberSummercamp'en hannerléisst hien e grousst Lach. Mais villeicht leit doran och eng Chance fir nei Talenter sech ze manifestéieren..
- Vum 23te Juli bis den 2ten August 2018 waren och eis **Avex** schlieslech um Tour. Fir hire **Summercamp** haten sie um Senningerbiere beim Chalet hir Zelter opgeschloen fir ënnert dem Thema „**native village**“ all Regester vun engem zünftegen Avex -Summercamp ze zéien. Well hir Branche dëss Saison vill Leit no uewen virungin, a kaum neier aus de Wëllef nokritt hat, waren sie nënnem e ganz kleng Grupp vun 3 Scouten déi ënnert engem onmoossege Betreuungsschlüssel vu 5 Cheffen eng ganz intensiv Zeit erliewe konnten. Et war dest awer eng bewusst Décisioun vun eiser Chefféquipe, déi och engem kleng Grupp vu Scouten e flotte Camp wollt bidden, an nett e puer wéineg Leit no der loi du grand nombre wollt oofstrofen, andeems sie de Camp irgendwelchen Rentabilitéisberechnungen geaffert hätt. An sie sollte Recht behalen, well déi kleng, heemlech Gemeinschaft eng ganz flott Zeit erlieft huet, déi sie nieft villen Ausfligg an Atelierien op hirem Hike op den Neihaisgen an d'Keltenhaus geféiert huet. Och d'Natur huet sie fir hir Standfestegkeet belount andeems sie Freides owends um 27te Juli de seltenen Spektakel vun enger totaler Moundfinsternis kombinéiert mat dem Phenomen vum sougenannte Blutmond bei engem total wollekefreien Hëmmel gebueden huet. Waat kann een méih verlangen?
- Déi nei Scoutssaison stoung schon virun der Diir, wéi mir nach eemol Ulaaf gehollt hun fir de läschten Optritt an der aler Saison. Vu Méindes dem 3ten bis Sondes dem 9ten September 2018, waren nees 7 Leit aus eise Reihen ënnert dem Motto „**Rosch Manuel goes Santiago**“ ënnerwee, fir de Rosch Manuel, eist Maskottchen, nees e Stéck méih no u **Santiago de Compostella** ze bréngen. Eise bewährten Albatrossteam ronderem d'Monique Watgen ass dest Joer vun 2 Neizougäng kompléiert ginn, woubei mir déck frouh waren, mat eise Polinger eweidere Frënd aus de Reihen vun der Amicale dobei

ze hun. No 5 Deeg Marche a bal 152 km duerch deelweis onberéiert Natur direkt hannert dem Ozean, hu mir Samsdes den 8te September nomëttes de Rosch op der St. Jacques-Bréck iwert de Floss Bidasoa zu Irun op spueneschen Territoire gesaat. No 1.282 km zu Fouss, mam Velo oder mam Kanu si mir elo, no 6 Etappen, um eigentleche Caminho (del Norte) ukomm. Ech zéien mein Hut virun der Leeschtung vum Pol, deen mat sengen bal 73 Joer een vun den erdegste Wanderer war.

- Elo waar , kurz virun der Rentrée, définitiv de Rideau gefall fir d'Scouts-Saison 2017/2018.
- No em déi 150 normal Versammlung mat de Kanner a Jugendlechen aus alle 6 Branchen, no mindestens 6 Grupperéit an enger Partie Virbereedungs - a Planungs Réuniounen vun de Cheffen vun den eenzelne Branchen an de 35 Wochen baussen de Vakansen, déi eng Saison ausmaachen, war elo nach e wéineg Zeit, Hiem a Foullard ze lëften , an e wéineg Distanz ze gewinnen, fir d'Batterien fir eng nei Saison nees ze lueden.